



**TEZAU LITURGIC**  
**10 FEBRUARIE**  
**PR.ILIE TETERKO**

**SLUJBA**  
**SF.CUVIOASE**  
**SCOLASTICA**  
**DE LA**  
**MONTE CASSINO**



**ODESSA, 2022**



# СЛУЖБА преподобной матери Схоластике, сестре преподобного Бенедикта Нурсийского

## НА ВЕЧЕРНИ

На Господи, воззвах: стихиры, глас 1:

Днесь Ангели и люди светло торжествует / в  
памяти твоей, мати Схоластико достоблаженная,  
/ чини бо Небеснии имут тя сликовственницу, /  
мы же к Богу ходатаицу теплейшую. / Темже не  
престай молитися // о всех любовью творящих  
память твою.

Жизнь свою возложила еси Христу и Спасу  
твоему / и, Его ради мира избегши, /  
уединилася еси в места пустынные, / житие  
Ангельское возлюбивши. / Тем и, кончину со  
славою великою обретши от Бога почитаему, /  
позналася еси наставица монахов, Схоластико  
равноангельная, // моли Христа Бога даровати  
нам велию милость.

От запада возсияла еси, якоже другое солнце, /  
преподобная мати Схоластико, / зарями  
сияющи твоих добродетельных деяний / и  
освещающи верных сердца сиянием чудес  
твоих, / и, яко сокровище многоценное, /  
предложила еси нам твоя мощи, / темже ты

присно ублажаем / и твою память почитаем,  
Христа величающе, // вельми тя прославльшаго.  
Уязвившись желанием любви Христовы, /  
житие ангельское в земнем телеси показала еси,  
/ Схоластикю мати всечестная, / отвергшись  
земныя славы, / притекла еси ко Христу и Тому  
последовала еси. / Темже тя всели в чертог  
пресветлый // Иисус Человеколюбец и Спас душ  
наших.

**Слава, глас 4:**

Приидите, любодевственнии вси / и чистоты  
рачителие, / приидите, монахов множества и  
преподобных жен сословие, / вси согласно  
верою воспоем / равноангельную двоицу  
всеблаженную: / Бенедикта всечестнаго и  
досточудную Схоластику. / И к ним припадем во  
умилении, / просяще низпослати нам от Господа  
// велия и богатыя милости.

**И ныне, Богородичен, глас тойже:**

От всех бед сохраняй певцы Твоя, /  
Благословенная Богородице Марие: // да Тя  
славим, надежду душ наших.

**Стихиры на стиховне, глас 6:**

От усердия песнь воспоем, / Схоластикю мати  
преподобная, / и восхваляем память твою  
немолчно, / блаженную воистинну и  
светоносную.

**Стих:** Честна пред Господем / смерть  
преподобных Его.

Явилася еси от матерних пелен / посвященна  
Богу, / Схоластиком всечестная, // и соделася еси  
храм Духа Святаго.

**Стих:** Что воздам Господеви о всех, / яже  
воздаде ми?

Молитвою и терпением, / паче же ко Господу  
любвию / стяжала еси дарования духовная, //  
чудесами украсившеся, мати Схоластиком  
блаженная.

**Слава, глас тойже:**

Услыши наша моления, / любвию к тебе  
прибегающих, Схоластиком всечудная, / и  
сердечная подавай прошения // чтущим святую  
память твою.

**И ныне, Богородичен, глас тойже:**

Творец и Избавитель мой, Пречистая, / Христос  
Господь, из Твоих ложищ прошед, / в мя  
оболкийся, первыя клятвы Адама свободи. /  
Темже Ти, Всечистая, / яко Божии Матери же и  
Деве воистинну / вопием немолчно: / радуйся,  
Ангельски, радуйся, Владычице, /  
предстательство, и покрове, // и спасение душ  
наших.

### Тропарь, глас 4:

Наставницу монахинь и Ангелов собеседницу, /  
просиявшую всем концем воздержанием светло  
/ и верных сердца озаряющую добродетельми, /  
восхваляем, вернии, Схоластику Богомудрую, //  
просяще теплаго ея предстательства.

### НА УТРЕНИ

#### По стихословии седален, глас 1:

Поет Богу Церковь, / днесь ликующи в памяти  
твоей, / Богодохновенная мати Схоластико, // и  
верою славит великия подвиги твоя.

#### Слава, и ныне, глас тойже:

Едина истинная христиан Покровительнице, /  
всяких лютых обстояний, / бед и скорбей нас  
избави // и молитвами Твоими спаси души  
наша.

#### По полиелее седален, глас 4:

Яко благоразумная и избранная дево, / во жгла  
еси в сердце твоём лампаду огня Божественнаго,  
/ орошая преизобильно елеем доброт твоих путь  
жизни своя, / душою присно отзываяся на  
вышнее призвание. / Сего ради возшла еси в  
Небесный чертог Христа - Жениха твоего, /  
равноангельная мати Схоластико, / молися  
грехов оставление даровати, // любовью  
празднующим святую память твою.

## Слава, и ныне, Богородичен:

Пророцы Тя предвозвестиша, / апостоли  
проповедаша, / мученицы прославиша, /  
святителие ублажиша, / темже и мы с ними  
Богородицу Тя исповедающе, // благочестно в  
песнях величаем.

### Таже степенна, 1-й антифон, глас 4.

Прокимен, глас 4: Терпя, потерпех Господа, / и  
внят ми, и услыша молитву мою.

Стих: И вложи во уста моя песнь нову, / пение  
Богу нашему.

Всякое дыхание: Евангелие от Марка, зачало 37.

### По 50-м псалме стихира самогласна, глас 6:

Свыше зарю приемши Святаго Духа, / мати  
Схоластикю преподобная, / земное житие на  
Небесное изменила еси, / иноческое  
возлюблюбивши / и в нем Богу угождаючи. /  
Ему же ныне невеста предстоиши, // проси нам  
веля милости.

## Канон святыя, глас 6.

### Песнь 1

*Ирмос: Яко по суху, пешешествовав Израиль /  
по бездне стопами, / гонителя фараона / видя  
потопляема, / Богу / победную песнь // поим,  
вопяше.*

Яко безплотна, на земли пожив, блаженная  
Схоластикю, / и ныне на Небеси с лики

преподобных сочетавааяся, / с ними же радуясь,  
поминай нас, чтущих тя верно.

**В**озлетела еси на Небеса, Христова голубице, /  
крилами воздержания и болезнями многими  
возвысившись.

**Ж**елание, еже паче всякаго хотения /  
вселившееся в душу твою, ум озари / и пламень  
Духа Святаго, вжег тебе, / просвети и страсти  
плотския попали.

**Богородичен:** Боголепное селение, Чистая, Ты  
была еси, / Небес пространнейшее и чистейшее,  
Богородице Дево Марие, / и ныне о Тебе  
радуется девственный лик.

### **Песнь 3**

**Ирмос:** *Н*есть свят, / якоже Ты, / Господи Боже  
мой, / вознесый рог верных Твоих, Блаже, / и  
утвердивый нас на камени // исповедания  
Твоего.

**З**емных попечений не уведела еси / и  
Небесными надеждами обогатилася еси: / на  
земли, яко Ангел, жизнь совершила еси,  
всеблаженная.

**П**лодовитая маслина, в дому Божественном яве  
насаждена, / явилася еси, мати Схоластико  
блаженная, / елеем подвигов твоих умасти наша  
лица, восхваляющих твоя чудеса.

**В**еселит монашествующих сердца житие твое,

мати всечестная, / наставляющи и  
утверждающи в спасительных заповедех  
Христовых / и к Небесному Царствию  
путеводящи нас.

**Богородичен:** Якоже неистошимое сокровище  
дарований Тя имуще, Владычице, / независтныя  
дары от Тебе чудес вси приемлем.

### Седален, глас 6:

Возшла еси на высоту безстрастия, / вшла еси  
во мрак Боговидения, / прияла еси в сердца  
твоем Божественный закон, / имже укрепься, /  
свотильник пресветел монашествующим была  
еси, // матери преподобная Схоластико.

### Слава, и ныне, Богородичен:

Пречистыя Твои руке, Дево Мати, простерши, /  
покрый уповающия на Тя и к Сыну Твоему  
зовущия: // всем подаждь, Христе, Твоя  
милости.

### Песнь 4

**Ирмос:** Христос моя сила, / Бог и Господь, /  
честная Церковь / Боголепно поет, взывающи,  
// от смысла чиста о Господе празднующи.

Просвещает верных божественная собрания /  
светлая и достославная память твоя, услаждает  
преподобных лики, / Ангелы веселит, с нимиже  
ныне водворяешься, славная.

Огнем воздержания испепелила еси хвратныя

сласти / и, разгоревшись углем Господни любви,  
/ чудес лучи возсияла еси.

**Я**вилася еси яко земля доброплодная,  
возрастившая монашествующих класы  
сторичествующия, / и сих совокупила еси в  
житницах Небесных, мати благословенная.

**Богородичен:** Свет рождающая, тьму разруши  
многих моих прегрешений Твоею зарею,  
Пренепорочная Владычице, / Яже Солнце  
правды верным возсиявшая.

### Песнь 5

**Ирмос:** *Божиим светом Твоим, Блаже, /  
утреннюющих Ти души / любовь озари,  
молюся, / Тя ведети, Слове Божий, / истинного  
Бога, // от мрака греховнаго взывающа.*

**И**сцеление ты даде всем верным Владыка  
Христос, Схоластиком добропобедная, / и твоими  
Божественными молитвами целиши страсти душ  
наших.

**М**ати всечудная, не забуди посещая чад своих, /  
совершающих честную память твою, / яко да  
молитвами твоими избудем от всякия нужды.

**В**озлетела еси на Небеса, яко голубица, крила  
облегчаючи воздержанием, / и достигла еси  
Небесныя обители, / идеже умом и сердцем  
сущи на земли пребывала еси.

**Богородичен:** Божественным сиянием Твоим,

Благая, / просвети омраченную душу мою и к спасения стези направи, / Единая Спаса Христа рождающая.

### Песнь 6

*Ирмос: Житейское море, / воздвигаемое зря / напастей бурю, / к тихому пристанищу Твоему притек, вопию Ти: // возведи от тли живот мой, Многомилостиве.*

**П**отекла еси за братом твоим Бенедиктом в пустыню, / последуя Христовым стопам Божественным, / и общница показался еси жития ангельского, всеславная, / за любовь твою изрядно венчаваема.

**С**толп добродетелей непреклонен, и благочестия жилище ты была еси, / и мужества, и целомудрия приятище, Схоластико всехвальная.

**Ж**ениха Христа возлюбивши, / добродетельми украсилась еси и, упещрена труды Божественными, / Чертога Его, Схоластико, сподобилась еси.

**Богородичен: Архангельский глас вопием Ти:** Радуйся, Благодатная, Господь с Тобою; / радуйся, Благословенная, Заступница наша и скорая в бедах Помощница.

## Кондак, глас 6:

Законоположницу монашествующим и правило кротости, / сестру и сомолитвенницу Бенедикта Богоблаженного / прими, Христе, молящуюся о нас мать Схоластику всечестную, // да с нею прославляем Твое Божество.

## Песнь 7

*Ирмос: Росодательну убо пещь содела Ангел / преподобным отроком, / халдеи же опаляющее веление Божие мучителя увеща вопити: // благословен еси, Боже отец наших.*

Ангельским житием, блаженная, пожила еси, / труды плодов своих умножила еси, и процвела еси добродетельми обильно, воспевая: / благословен еси, Боже отец наших.

Чудес лучи испущаеши, и отъемлещи недугующим болезни, / и здравие о Бозе подаваеши, / от ковчега мощей твоих благодать источающи вопиющим: / благословен еси, Боже отец наших.

Совершающих твою память, Схоластиком славная, / всегда поминай со дерзновением многим, / Господа молящи Всещедрого, Ему же зовем: / благословен еси, Боже отец наших.

**Богородичен:** Во тьме неразумения мя пребывающаго, / просвети Светом Непреступным Сына Твоего, Пречистая, / и

настави верно взывати Ему благочестно: /  
благословен еси, Боже отец наших.

## Песнь 8

*Ирмос: Из пламене преподобным росу источил  
еси, / и праведнаго жертву с водою попалил еси:  
/ вся бо твориши, Христе, токмо еже хочети.  
// Тя превозносим во вся веки.*

Светом Небеснаго просвещения озаряема, мати  
достоблаженная, / воспевающия тя ныне  
просвещаеши, песнопоющия Христу: / Тя  
превозносим во вся веки.

Уязвився божественным желанием,  
всеблаженная, / непорочно и праведно житие  
препроводила еси, / дондеже достигла еси  
поклонитися Престолу Господню, со Ангелы поя:  
/ Тя превозносим во вся веки.

Просвещена сиянием чистоты и добродетельми  
испещренна, / предстоиши, Схоластико дево  
всечестная, Христу Богу нашему, вопиюще со  
всеми святыми: / Тя превозносим во вся веки.

**Богородичен:** Яже Владыку всех плотию  
рождшая, насилия страстей избави мя,  
Отроковице, / и Творцу всяческих присвой  
любовию, поющего во вся веки.

## Песнь 9

**Ирмос:** Бога / человеком не возможно видети, / на Него же не смеют чини Ангельстии взирати; / Тобою же, Всечистая, явися человеком / Слово воплощенно, / Его же величающе, // с Небесными вои Тя ублажаем.

Тимение оттрясши плотских страстей, блаженная, / всю себе к Божественней пресели жизни и наслаждению невестественному, / идеже, ликуя, назираеши нас, мати всечестная.

Смотря свыше, чудяшеса лик Ангельский терпению твоему, Схоластико благословенная, / како безплотныя враги с плотию побеждала еси благодатию Христовою.

Общим союзом любве, юже имате ко Христу, / нам, ныне почитающим вас любовью, / Бенедикте и Схоластико всечуднии, с пожившими по Бозе с вами чады духовными, / молитесь вкупе Христу Богу и нам быти причастником славы Его.

**Богородичен:** Мысленно Твоим стопам прикасаяся, Всенепорочная, молю Тя: / пение мое прими и от бед избави мя, молитвами Твоими, Дево Марие, / да любовь Тя величаю.

### Светилен:

Предстоще ныне Трисиянному Великому Свету / и пребывающе в неизреченной светлости со всеми святыми, / Схоластикомати благословенная, помяни всех нас, / память твою светоносно совершающих.

### Слава, и ныне, Богородичен:

Света Превечнаго родила еси нам, Христа, Бога нашего, Пречистая Дево, / избавльшаго весь мир от лести диавола. / Темже молим Тя: не престай молящи, / да подаст нам милость Свою в День Судный.

### На стиховне, Слава, глас 1:

Яко девства храм, / яко чистую голубицу, / яко горлицу непорочную, / яко невесту Христову, / красную добротойю ты и непорочную, / яко образ Божественных добродетелей, вернии, почитаем, // Богоносная Схоластикомати, мати всечудная.

## НА ЛИТУРГИИ

Прокимен, глас 4: Святым, иже суть на земли Его, / удиви Господь вся хотения своя в них. Стих: Презрех Господа предо мною выну, / яко одесную мене есть, да не подвижуся.

Апостол к Галатам, зачало 208.

Аллилуиа, глас 4: Воззваша праведнии, и

Господь услыша их, и от всех скорбей их избави их. **Стих:** Многи скорби праведным, и от всех их избавит я Господь.

**Евангелие от Матфея, зачало 104.**

**Причастен:** Радуйтесь, праведнии, о Господе, правым подобает похвала.

**[К приближающейся памяти преподобной Схоластики (†543, память 10 (23) февраля), сестры преподобного Венедикта Нурсийского, выкладываю в «Уставные заметки» неполную полиелейную (отсутствуют хвалитные стихиры) службу ей, составленную клириком города Одессы (Украинская Православная Церковь) **протоиереем Илией Тетерько.**]**

